

Wie is joen held?

Ooit zaten wij in een karkdienst bij een gezinsviering argens in Drenthe. Het thema was "Een dappere held" en het gung over David die mus vechten tegen reus Goliath. De dominee vreug an de kinder of zij ok een held as veurbeeld hadden.

Jaah....Superman, met die cape! Verder reupen de kinder namen as Arjen Robben, Zorro, Brandweerman Sam en Sven Kramer; dominee was zölf fan van Jannes. Ok ik kreeg de microfoon under de neuze drukt; of ik ok een held haar?

Daniël Lohues uut Erica.

Daniël voldeu niet echt aan de heldhaftige beelden van aandere helden die deur de kinder andragen weuden, dus dat mus ik eem uutleggen.

Hij is veur mij een held omdat hij oons Drenten veul zölfbewuster maakt hef. Hij begunde met Skik in het Drents te zingen en is uutgruid tot een nationaal bekende zanger.

Hij leerde oons um trots te wezen op onze afkomst en op het Nedersaksisch. Hij schref prachtige teksten en maakt hiele mooie muziek.

Ik neem joe eem met naor de jaoren '60 en '70.

Op de legere schoele in Hoogersmilde preuten wij as kiender allemaole Drents met mekaar, allent de mister preut Hollands.

Op de MAVO in Smilde kun ok iederiene zien eigen streeктаol praoten (Fries, Maleis, Drents) zunder dat daor moeilijk over daon weur deur de leerkrachten.

Toen ik hen de HAVO in Assen gung zat was het Drents opiens een ding. D'r was daor zölf s een leraar Nederlands die het bestun um in de pauze, toen wij zaten te klaoverjassen, tegen oons te zeggen: "Praat eens gewoon Nederlands man, altijd dat achterlijke plattelands!" Tot op het bot beledigd was ik. In de weke daorna schreef ik een vlammend betoog over de streeктаol in de vorm van een opstel en kreeg een 9. "Maar ik ben het niet met je eens!" stun d'r under.

In de loop van de jaoren kachelde het gebruik van de streeктаol behoorlijk achteruut en het imago weur d'r niet beter op.

As d'r al ies een Drent op een landelijk televisieprogramma kwam, dan wa'j al bliede as e niet as een 'boertie van buten' wegzet weur.

D'r weur altied wat neerboegend daon over noordelingen in het algemien en heur accent in het biezonder.

Wij warkten as Drenten netuurlijk ok gewoon met; deuden oons uuterste best um goed Nederlands te praoten en mien generaotie voedde de kinder zölf s niet meer op de met streeктаol.

Ok ik pas mij eigenlijk altied an, maor in gezelschap van noordelingen praot ik altied plat.

Toen ik ooit ies een Drentse mop vertelde, was d'r ien luusteraar die de clou niet metkreeg.

"Ja, ik heb altied een beetje moeite met dat verbasterde Nederlands...".

Nou ja zeg! Zu' we de kärke eem midden in 't dörp laoten?

Die meneer heb ik destieds haarfijn uutlegd dat het Nederlands afstamt van het Nedersaksisch/Nederduuts, oonze streeктаol die nog praot wordt in Denemarken, Noord Duutslaand, en in de provincies Groningen, Drenthe, Overijssel en Gelderland.

Nederlands is dus verbasterd Nedersaksisch.

Dat e 't maor eem wus.

Drenten leuten zich van nature makkelijk wat zeggen.

Ze reageerden vaak wat ofwachtend en leupen niet veurop in de polonaise.

As iene die hard schrowde het beter dacht te weten, dan legde de Drent zich daor al gauw bij neer.

Lohues zorgde veur een aandere wiend.

"U woont hier ver vandaan" zeggen ze elders in het laand. "Insgelijks. U ook, a j' 't zien van dizze kaant" zingt hij in 'Hier kom ik weg'.

"Zij denkt dat zij het zo goed veur mekaar hebt daor in het westen, maar wij wit wel beter; wij hebt hier de ruimte, schone lucht en wij hebt het goed met mekaar" zee e ooit samenzweerderig tegen de zaal in de Stadsschouwburg in Grunn'n.

Lohues zit bij Matthijs van Nieuwkerk en Eva Jinek an taovel en is zichzölf.

Een Drent, een top musicus en een goeie zanger.

Hij lat oons zien: as Drent huu'j joe echt niet minder te vuulen as iene uut Amsterdam.

Hij leert oons um trots te wezen op waor wij weg komt.

Laot je maor heuren.

He'j n accent? Gef niks; hef Lohues ja ok.

Dit hiele verhaol kun ik op die zundagmorgen in de karkdienst netuurlijk niet hielemaol kwiet, maor op dit platform krieg ik eem de ruimte.

Dus daorumme is Lohues mien held.

Hij past dus wat mij betreft ok prima in dat rijgie; Robben, Zorro, Lohues, Brandweerman Sam en Sven Kramer.

Ada Wanninge-Vrieswijk